

Schaaf, Charles Weiler, Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering, Fernand Etgen, Patrick Goldschmidt (par M. André Bauler), Gusty Graas, Mmes Carole Hartmann, Mandy Minella, Lydie Polfer et M. Gérard Schockmel ;

M. Dan Biancalana, Mmes Taina Bofferding, Liz Braz, Francine Cloeser, M. Yves Cruchten, Mme Claire Delcourt, MM. Mars Di Bartolomeo, Georges Engel, Franz Fayot, Claude Haagen, Mme Paulette Lenert et M. Ben Polidori ;

Mme Djuna Bernard, M. Meris Sehovic, Mmes Sam Tanson et Joëlle Welfring ;

MM. Sven Clement et Marc Goergen ;

MM. Marc Baum et David Wagner.

Ont voté non : MM. Dan Hardy, Fred Keup, Michel Lemaire, Mme Alexandra Schoos et M. Tom Weidig.

Freet d'Chamber d'Dispens zum zweete Vote constitutionnel?

(Assentiment)

Dann ass dat esou decidéiert.

6. 8463 – Projet de loi introduisant une procédure de préfinancement pour les installations solaires photovoltaïques et modifiant :

1^o la loi modifiée du 1^{er} août 2007 relative à l'organisation du marché de l'électricité ;

2^o la loi modifiée du 23 décembre 2016 instituant un régime d'aides pour la promotion de la durabilité, de l'utilisation rationnelle de l'énergie et des énergies renouvelables dans le domaine du logement ;

3^o la loi modifiée du 7 août 2023 relative aux aides individuelles au logement

Da komme mer zum nächste Punkt op eisem Ordre du jour vun de Moien, an zwar dem Projet de loi 8463, der Aféierung vun enger Virfinanzierungsprozedur fir Fotovoltaikanlagen. Mir hunn hei e Basismodell. Ageschriwwen si schonn: den Här Jeff Boonen, den Här Georges Engel, den Här Tom Weidig, d'Madamm Joëlle Welfring, den Här Sven Clement an den Här David Wagner. An d'Wuert huet elo d'Rapportrice vum Projet de loi, déi honorabel Madamm Carole Hartmann. Madamm Hartmann.

Rapport de la Commission de l'Économie, des PME, de l'Énergie, de l'Espace et du Tourisme

Mme Carole Hartmann (DP), rapportrice | Merci, Här President. Léif Kollegeinnen a Kollegen, beim Gesetzestext, deen ech Iech virstellen, geet et doréms, de Prefinanzement vun de Fotovoltaikanlage fir 2026 en place ze setzen.

De Prefinanzement vun de Klima- an Ëmweltsubventionen ass eppes, wat mir am Koalitionsaccord an am PNEC stoen hunn. Et geet doréms, d'Leit ze encouragéieren, op de Wee vun der grénger Transition ze goen an ze investéieren. Déi besch Subventiounen bréngen näischt, wann d'Leit net d'Moyenen hunn, fir d'Sue virzestrecken. An dacks mussen si nach méintelaang waarden, aktuell, fir hir finanziell Hëllef ausbezuelt ze kréien. Dat ka sech net jidderee leeschten.

Mat der Virfinanzierung müssen an Zukunft eis Biergerinnen a Bierger keng Sue méi virstrecken, wa si sech eng PV-Anlag zouleeën. Si müssen an Zukunft just nach hiren Deel vun der Rechnung bezuelen, an de Staat iwwerweist dann d'Subventioun direkt un de Betrib.

Dofir mussen sech déi Betriber, déi hei matmaache wëllen, am Virfeld an de „registre des installateurs admis à la procédure de préfinancement“ aschreiwen. Wann ee bis am Regëster steet, muss den Installateur d'Subventioun direkt op d'Facture applizéieren, fir dass de Client just säin Deel bezuele muss.

Duerno freet de Betrib de Remboursement beim Staat un. An dës Prozedur ass komplett digitaliséiert. De Ministère huet da maximal 15 Schaffdeeg Zäit, fir eng Decisioun ze treffen. Wa bannent dësem Delai keng Äntwert do ass, da gëllt de Prinzipp vum „accord tacite“ oder „silence vaut accord“. Direkt duerno soll et bannent wéinege Wochen zur Ausbezelung kommen, fir dass d'Betriber net ze laang op hir Sue waarde müssen.

Am Fall, wou d'Betriber reegelméisseg Demanden erareeche, déi inkorrekt oder onkomplett sinn, kënnen se vum Regëster suspendéiert ginn. Bei Bedruchsversich risquéieren d'Betriber, aus dem Regëster gestrach a vum Prefinanzement ausgeschloss ze ginn, ouni d'Méiglechkeet, an Zukunft erëm matzemaachen. Doweinst wäerten zoufälleg Kontrolle vun den Demandé gemaach ginn, mat zousätzlechen Iwwerprüfungen am Fall vun engem Doute. Dësen Text gesäit och den Accès zu den néidegen Date vir, fir dës Kontrollen duerchféieren ze kënnen.

De Klimabonus-System, wéi mir e bis elo kennen, gëtt net ersat, mee de Prefinanzement ass eng nei Optioun, déi derbäikënn. De Client kann also d'Approche wëhlen, déi e wëll, wuel wëssend, dass de Montant vun der Subventioun, déi e kritt, identesch ass.

Et wäert och en informatesche Contrôle en place gesat gi fir ze iwwerpréieren, dass déi Demanden, déi vun der Ëmweltverwaltung traitéiert ginn, net scho vun enger Subventioun am Kader vum Prefinanzement profitéiert hunn.

A wann ee sech gläichzäiteg eng Batterie zesumme mat der PV-Anlag zouleet, kann een duebel vum Prefinanzement profitéieren. Batterien, déi eenzel kaaft ginn, kënnen net vum Prefinanzement profitéieren, mee wa se eng scho bestoend Anlag ekipéieren sollen, da si se och eligibel, fir eng Subventioun ze kréien.

Dëse Gesetzestext soll dann och d'Berechnungsmethod vun de Subsidien upassen. Aktuell kritt ee 50 % vun der Installatioun vun enger Fotovoltaikanlag staatlech subventionéiert. A verschidde Gemengen hu souguer déi reschtlech 50 % bäigeluecht. Ab elo soll et forfaitaire Zomme ginn, ofhängeg vun der Capacitéit vun der Anlag a vum Stockage. Et gëtt also zwou degressiv Formelen: eng fir d'PV-Anlag, baséierend op der Leeschtung, an eng fir d'Batterie, baséierend op der Capacitéit. D'Formel ass degressiv, fir de Basispräis vun der Installatioun vun der PV-Anlag och mat ze berücksichtegen.

Méi kleng Anlage kréie prozentual eng méi héich Hëllef. Wann een e méi gënschtege Präis kritt, kann d'Hëllef an Zukunft souguer bei iwwer 50 % leien. Esou hunn d'Consommateuren en Interêt dorun, méi Offere mateneen ze vergläichen an déi méi attraktiv Offer ze huelen. Dëst féiert zu méi Konkurrenz tëschent den Installateuren. A fir ganz grouss Installatiounen sinn awer och Ausname virgesinn, an et gëtt verschidde Plaffongen. All d'PV-Anlagen, déi virum 31. Dezember 2029 bestallt ginn, si fir d'Subventioun eligibel.

Här President, ech kommen dann nach zu den Avisen, déi mer an der Kommissioun erakuten, véier Avisen an dräi Avis-complémentairen.

De Gesetzestext ass am November 2024 deposéiert ginn.

Dem Staatsrot säin Avis krute mir den 29. Abrëll 2025. An dësem huet en zwou Oppositions formelles ausgeschwat, dëst um Niveau vun den Artikelen 3 a 4, well den Delai, an deem de Minister seng Decisioun treffen soll, net preziséiert war, wat zu enger juristescher Onsécherheet gefouert hätt. Duerch d'Amendementen konnten am complémentaires Avis vun der héijer Kierperschaft, deen den 21. Oktober 2025 komm ass, all d'Oppositions formelles opgehewe ginn.

Den Avis vun der Handelskummer krute mir den 3. Februar dëst Joer. D'Handelskummer begréisst d'Introductioun vum Prefinanzementsmechanismus an och d'Mise en place vum Prinzipp „silence vaut accord“, wann et ëm d'Decisioun vum Remboursement vun der Subventioun un d'Betriber geet. D'Handelskummer proposéiert, dass de Prefinanzement och op kleng a mëttelstännesch Betriber ausgeweit sollt ginn. An hirem complémentaires Avis begréisst d'Handelskummer, dass och Batterië subventionéiert gi kënnen, déi net zesumme mat enger PV-Anlag kaf ginn, wa se eng bestoend PV-Anlag kompletéieren sollen. Si bedauert awer, dass een an dësem Fall net vum Prefinanzement profitéieren kann.

D'Handwerkskummer huet an hirem Avis vum 28. Februar dëst Joer och de Prefinanzement begréisst. Si ass der Meenung, dass dëst d'Installatioun vu méi PV-Anlage favoriséieren kéint. An d'Handwerkskummer insistéiert drop, opzepassen, e séiere Remboursement vun den Installateuren virzegesinn, fir dass et net zu Liquiditéitsschwieregkeete kënn.

Den Avis vun der Chambre des Salariés krute mir de 4. Mäerz 2025 eran. Si begréisst de Prefinanzement an ënnersträicht, dass et dréngend noutwendeg ass, de Prefinanzementsmechanismus fir all d'Aidë vum Klimabonus Wunnen en place ze setzen, fir géint d'Précaritéit énergétique virzegoen.

D'Chambre des Salariés kritiséiert déi nei Berechnungsmethod a seet, dass et a verschidde Fäll dozou komme kéint, dass déi maximal staatlech Hëllef, déi d'Leit kréien kënnen, manner héich ausfällt, wéi dat virdrun de Fall war. D'Chambre begréisst d'Aféierung vun Prinzipp vun der Degressivitéit, mee si fäert awer, dass d'Reduktioun ze staark ausfällt an d'Energietransitioun bremsen kéint, andeems se en negatiivt Präissignal erausschéckt.

D'Chambre des Salariés begréisst d'Kreatioun vun enger Aide, déi spezifesch fir d'Batterië gëllt. An hirem complémentaires Avis vum 9. Oktober 2025 begréisst si, dass elo déi sougenannte Stand-alone-Batterien och vun dëser Aide profitéieren kënnen, mee bedauert, dass si net fir de Prefinanzement eligibel sinn.

D'Chambre des Salariés freet sech och iwwert d'Reduktioun vun der minimaler Spëtzeleeschtung vun 3 op 2 Kilowatt vun de PV-Anlagen, fir vun den Hëllef profitéieren ze kënnen. Dëst hat si och an hirem éischten Avis kritiséiert, well doduerjer d'Besëtzer vu klengen Daachflächen hätte kënnen ausgeschloss ginn.

Domat sinn ech um Enn vu mengem mëndleche Rapport. An ech ginn heimadder ganz gären och schonn den Accord vun der DP-Fraktioun.

Plusieurs voix | Très bien!

M. Claude Wiseler, Président | Merci, Madamm Hartmann, fir Äre mënschlechen a fir Äre schrëftleche ...

(Hilarité)

... fir Äre mëndlechen a fir Äre schrëftleche Rapport. An e war och mënschlech.

An den éischten ageschriwwene Riedner ass den Här Jeff Boonen. Här Boonen, Dir hutt d'Wuert.

Discussion générale

M. Jeff Boonen (CSV) | Jo, merci, Här President. Den Ausbau vun den erneierbaren Energien ass eng absolut Prioritéit fir d'Regierung an och fir eis als CSV. Dës Prioritéit geet och aus dem Koalitiounsaccord ervir. A mat dësem Gesetzesprojet setze mir ee Projet dovun em.

D'Energiekris an déi grouss Subventiounen am Beräich vun de PV-Anlagen hunn déi lescht Joren zu engem groussen Zouwuess bei der Solarenergie gefouert, speziell am Beräich vun der Autoconsommation. D'Dynamik dierf elo net offlaachen. Mir dierfen eis net op deem Succès ausrouen.

D'Analys bei de Limite weist, dass generell entweeder d'Netzcapacitéit net duergeet oder awer déi finanziell Méiglechkeeten – an d'Rapportrice ass dorop agaang – fir d'Leit eng Brems sinn, dat heescht d'Kapital, fir d'Anlag virzefinanzéieren. Fir et emol ganz einfach ze soen: D'Menagë mat gudder finanzieller Mëttel a mat fräien Netzcapacités haten elo d'Méiglechkeet, eng Anlag ze leeën. All déi aner hunn nogekuckt.

D'Problematik vun de finanzieller Moyene gëtt och am Klimasozialplang opgewisen. An et ass genee dee Punkt, wou dësse Projet uesetzt. De Client bezilt just nach säin Deel vum Investissement. Dës Messur erlaabt et, dass méi Leit an d'Produktion vun erneierbarer Energie kënnen investéieren. Domat huele mir méi Leit mat an der Energietransition.

Am System, wéi en elo bestanen huet, war et am Fong emol eng Ëmverdeelung vun ënnen no uewen: D'Allgemengheet huet deenen, déi et sech leeschte konnten, hir PV-Anlag zum groussen Deel bezuelt. Dat ass elo ansicht mat der Prefinanzéierung. D'Ënnerstëtzung vun der erneierbarer Energie gëtt méi sozial a méi gerecht.

Här President, mir begrëssen den neie Berechnungsmodell an och d'Modalitéiten, wéi d'Bäihëllef ausbezahlt ginn. Duerch e fixe Montant, deen ofhängeg ass vun der Leeschtung, gëtt de Keefer motivéiert, déi interessantsten Offer zréckzebehalen. An d'Konkurrenz am Secteur spillt och do mat.

Mir verhënnere am Fong geholl, dass extreem deier Anlage geluecht ginn oder d'Subside mat agepräist ginn. An dat hu mer jo och gesinn an deene leschte Joren: Wéi de Subsid op 67 % eropgaang ass, sinn d'Anlagen direkt méi deier ginn. An ech mengen, dat gëllt et ze verhënnere.

Wann een elo e Beispill hält: Eng Anlag vun 9 Kilowattpeak kann zwëschen 10.000 an 20.000 Euro kaschten. Dir kritt ëmmer 7.700 Euro Subsid laut deem heite Gesetz, da leit der bei 10.000 Euro Invest bei 77 % kloer méi héich, wéi mer et elo hunn. An dat bedeit, dass mer déi Aidë vill méi effizient asetzen an domat och déi ëffentlech Gelder vill méi effizient asetzen.

Doniewent stärke mer mat de Modalitéiten d'Handwerksbetriber. Si kréien hir Sue séier bannent engem Mount. An d'Qualitéit ass doduerch assuréiert, dass d'Betriber, déi registréiert sinn an deem Regëster, och eng gudd Qualität vun Aarbecht maachen.

Mir hu gesinn, dass déi grouss Attraktivitéit vun de Fotovoltaikanlagen dozou gefouert hat, dass vill Acteuren um Marché aktiv gi sinn. Jidderee konnt op eemol Fotovoltaikanlage leeën. An hei mengen ech, muss ee sech awer elo enregistrieren. An domadder gëtt séchergestallt, dass de Client och eng Qualität kritt.

Här President, ech wëll betounen, dass mir et wichteg fannen, dass nieft deem neie Finanzierungsmodell awer och deen ale Modell bestoe bleift. Speziell fir gréisser Anlagen, iwwer 15 Kilowatt, ass awer de Montant vu 50 % Bäihëllef méi interessant. Et muss een zwar da selwer virfinanzéieren, mee mir fannen et wichteg, dass een och weider ka gréisser Anlage leeën, well mer all eis Daachfläche sollen notzen.

Natierlech ass dat fir déi eege Consommation net ëmmer dat Interessantst. Mee mir hu jo awer neierdengs d'Méiglechkeet, Stroum ze deelen. A genee do kann dat dann awer eng Roll spillen. An do kann een zum Beispill Stroum deele mat sengem Noper, dee vläicht nëmme Locataire ass. Da kann deen och profitéieren vun dem Ausbau vun der Fotovoltaikanlag. Mir maachen domat eigentlech dee bëllege selwer produzierte Stroum méi op fir all déi aner. An dat ass eis wichteg. Mir fannen et wichteg, dass mer all d'Daachflächen zouleeën an eis net hei begrenzen op kleng Anlagen.

Fir eis ass dat hei e wichteg Schratt, fir d'PV-Anlagen an domat d'Energietransition fir jiddereen disponibel ze maachen. Weider Projekte bei der Prefinanzéierung sinn an der Pipeline. Den Ëmweltminister Serge Wilmes huet anonncéiert, dass am Beräich vum Wunnen, vu Wärmepumpelen awer och vun der Mobilitéit hei Projekte kommen.

Domat ginn ech den Accord vun eiser Fraktion.

Plusieurs voix | Très bien!

M. Claude Wiseler, Président | Merci, Här Boonen. Elo huet den Här Georges Engel d'Wuert. Här Engel.

M. Georges Engel (LSAP) | Merci, Här President. Fir d'LSAP ass d'Energietransition eng Fro vu sozialer Gerechtegkeet. An duerfir ass d'Zilsetzung vun dësem Projet och déi richteg: et de Stéit méi einfach maachen, a Fotovoltaik ze investéieren, andeems mer déi héich initial Käschte reduzéieren. Dat ass e gudder Projet, e geet an déi richteg Richtung. Mir wäerten en och matschtemmen. Dat ass eng sozial an energiepolitisch wichteg Moossnam.

An awer hu mer véier Punkten, déi ech hei wëllt ervirbréngen, nämlech de Punkt vun der Netvirfinanzéierung vun de Stand-alone-Batterie bei bestoende PV-Anlagen. Well energiepolitisch ass dat awer net ganz konsequent. Mir brauche Späicher, net just bei neien Anlagen. An dofir wär et gudd, wa mer och déi Batterie géinge matfinanzéieren, fir grad och bei bestoenden Anlagen d'Netz da kënnen ze entlaaschten an och fir sech déi Stand-alone-Batterien da weider kënnen unzeschaffen.

En zweete Punkt, jo, deen Tempo, deen d'Regierung sech hei virgëtt, deen ass gudd. Dat geet ganz séier. Mee eis feelt et e bëssen u Key Performance Indicators, fir ze kucken, wéi séier do ka geschafft ginn. Well am Moment ass et jo eng Katastroph, dass du annerhalleft Joer op deng Sue muss waarden. Dat ass net ganz gudd.

An duerfir ass deen heite Gesetzestext do vill besser. Dee gesäit ganz kuerz Friste vir. Mee mir hätten do gären e méi klore Suivi. An och wiwill Dossierien net op Mount do kënnen traitéiert ginn, wéi laang dat an der Moyenne mat der Bezuelung dauert, do wäere mer frou, wann dat och géing pousséiert ginn. Ech weess, dass de Minister vläicht elo net haut kann drop äntweren. Dat ass och net schlëmm. Ech wollt et just als Remark hei soen.

Dann nach en drëtten Punkt: Et muss een och oppassen, dass de Cashflow bei den Installateuren net op eemol an de Keller rutscht. Well de Risiko fällt hei bei d'Betriber, an do kéint et sinn, dass eventuell och déi kleng Betriber hei e bëssen an d'Bredouille kommen.

Et wär gudd, wann d'Regierung dat géing am A behalen.

An e leschte Punkt: Dee Registersystem, deen elo agefouert gëtt, dee fanne mer och ganz legitim. Mir mussen nämlech oppassen, dass mer net an eng Präisspiral kommen, wéi den Här Boonen elo virdu gesot huet, an dass et och kee sozialen Dumping gëtt. Well wann de Staat bis do Sue mobiliséiert, da muss een oppassen, dass et do net zu exzessive Präiserhéijunge kéinnt.

Dee Projet hei geet an déi richteg Richtung a mir stëmmen deen och mat. Merci.

Une voix | Très bien!

M. Claude Wiseler, Président | Merci, Här Engel. Den Här Weidig huet d'Wuert.

M. Tom Weidig (ADR) | Merci, Här President. Léif Kolleegen Deputéiert, dëst Gesetz féiert zu enger Vereinfachung a Beschleunegung vun den administrative Prozeduren. Duerch de Prefinanzement muss de Bierger net méi déi Subside virstrecken. Mir als ADR setzen eis ëmmer fir eng Simplification administrative an. Dat steet och explizit an eise Walprogramm. Duerfir wäerte mir dëst Gesetz matschtemmen.

Am Gesetz steet dran, dass eng Demande innerhalb vu 15 Deeg traitéiert muss ginn, soss gëtt se automatesch akzeptéiert. An den Handwerksbetrieb soll d'Sue maximal 15 Deeg no der Entscheidung kréien. Wann ee bedenkt, dass mir Fäll vu Leit kennen, déi bal 15 Méint op hir Sue gewaart hunn, wär dat effektiv eng enorm Vereinfachung a Beschleunegung – vu 15 Méint op quasi 15 Deeg. Dat ass schwéier ze gleewen, zemoos ouni dass et zu manner Qualitéitskontrolle kéinnt an domat de Risiko vu Mëssbrauch an d'Luucht geet. Mir sinn also skeptesch, mee mir géifen eis natierlech freeën, wann déi betreffend Administratioun dat géif fäerdegbréngen.

Mir stëmmen dat mat, obwuel mir mengen, dass déi Subside fir den Ausbau vun der Fotovoltaik a Batterien de Marché verzerrt an och laangfristeg net der Ëmwelt hëllef wäert. Hei gëtt nëmme per force un enger Ideologie, enger Relioun, dogmatesch festgehalten. Mir wäerten also, wann dat Gesetz kéinnt, géint eng Verlängerung vun engem Subsid stëmmen. Mee mir stëmmen dëst Gesetz awer mat, well hei probéiert gëtt, eng administrativ Prozedur weesentlech ze verbessern. Dat fanne mir gudd an dat soll och esou weidergemaach ginn.

Merci.

M. Fred Keup (ADR) | Très bien!

M. Claude Wiseler, Président | Merci, Här Weidig. Madamm Joëlle Welfring.

Mme Joëlle Welfring (déi gréng) | Merci, Här President. Wéi ech am Mee 2022 als Ëmwelt- a Klimaministesch an d'Regierung koom, war d'Ausarbeitung vum Nationalen Energie- a Klimaplang ee vu mengen Haaptchiantieren. An enker Zesummenaarbecht mam deemolegen Energieminister, dem Claude Turmes, an a Koordinatioun mat acht anere Ministèren a villen Acteuren aus der Gesellschaft hu mer ronn 200 Moosnamen ausgeschafft mam dräifachen Zil, eng propper an zuverlässeg Energieversuergung unzëiden, Land a Leit virun heefeg Wiederextreemer ze schützen a fir sozial a fair Bedingunge fir Mënschen a Betriber ze suergen.

An dëser Zäit – an dat war d'Zäit vum Ufank vum russeschen Ugrëfskriich a vun den explodéierenden Energiepräisser – ware vill Leit bereit, zum Beispill an d'Isolatioun vun hirem Haus oder an erneierbar Heizsystemer ze investéieren. Mee net jidderee konnt sech et leeschten, déi Käschte virstrecken. Fir dëser

Realitéit Rechnung ze droen, hu mer de besteende System verbessert, d'Tauxe vun de Bähillefe gestärkt, d'Personal ausgebaut, d'Demarché vereinfacht an digitaliséiert, an awer och parallel dozou en neien Usaz virbereet: d'Virfinanzierung.

Dofir hu mer och d'Virfinanzierung 2023 als e wichtige Bausteen an de Klimaplang opgeholl, eebe well dëst Instrument et erméiglecht, dass och Stéit mat manner héijem Akommes energieetes Moosname kënnen ugoen an dass och si hir Energiekäscht kënnen dauerhaft erofkréien a vun de staatleche Bähillefen effektiv profitéieren. Fir vill Leit bedeit dat manner Drock um Enn vum Mount an eebe méi Kontroll iwwer hir eegen Energiekäschten. Et ass also e Schrëtt a Richtung méi Gerechtegkeet – eent vun eisen Haaptziler.

Dass déi aktuell Regierung deen Energie- a Klimaplang e Joer méi spéit quasi integral iwwerholl huet, weist, dass déi Mesüren, déi mir getraff hunn, also net sougenannt „ideologesch“ Mesüre waren, mee parteiwwergreifend gedeelt ginn. An dat begrësse mir natierlech.

Nieft dem Prefinanzement gesäit dëse Projet de loi awer nach weider Verbesserung vir, déi mir och ausdrécklech begrëssen. An dat ass, nieft der Eligibilitéit vu Stand-alone-Batterien, och d'Upassung vun der Berechnungsmethod fir d'Bähillefe vu PV-Anlagen. Hei gëtt an Zukunft net méi de fixe Prozentsaz vun Ausgabe mat engem maximale Plaffong ausbezuelt, mee et gëtt op Leeschtung an Euro pro Kilowattpeak gekuckt. Dat erlaabt et, d'Entwécklung vun de vergläichsweis héije PV-Modullpräisser hei am Land an de Grëff ze kréien.

Mat Bléck op verschidde praktesch Froen, déi sech am Zesammenhang mam Prefinanzement stellen, wëilt ech Iech, Här Minister, och ouni Motioun froen, eis wannechgelift no sechs Méint Lafzäit eng Zort Bilan vun dësem Regime ze presentéieren, deen eis géing erlaben, ze kucken, wat dee sougenannte Pilotversuch u Virdeeler bruecht huet, fir vulnerabel Stéit, fir d'Transitioun, fir d'Handwerksbetriber an och fir d'Evolutioun vun de PV-Präisser. Mee dat wär och eng gutt Basis fir déi weider geplangten Ausweitungen op aner Aidëberäicher.

Et wier zum Beispill och wichtig ze wëssen, wéi oft de Prinzipp „silence vaut accord“ applizéiert gouf a mat wéi enge Konsequenzen, fir novollzéien ze kënnen, ob zum Beispill budgetär oder personaltechnesch Upassunge musse gemaach ginn.

Doriwwer eraus wier et och wichtig, op d'mannst eemol pro Joer d'Evolutioun vun der Benotzung vun de Klimabonus-Aiden a vun hiren Auswierkungen op déi vulnerabel Stéit an op d'Transitioun ze bewäerten, an enger Commission jointe zum Beispill mam Ëmweltminister.

Mee och wann dëse Projet de loi e wichtige Schrëtt fir d'Ëmsetzung vum Nationalen Energie- a Klimaplang ass, bliwen nach vill Froen op zu weidere wichtige Moosnamen aus dem PNEC, déi dréngend missten ëmgesat ginn, fir eist Land op d'Zukunft ze preparéieren. Dofir follgend weider Froen un de Minister:

Gëtt et en ongeféieren Zäitplang fir d'Erweiterung vum Prefinanzement op aner Klimabonus-Bähillefen, wëssend, dass dësen e wichtige Baustee vun enger gerechter Transitioun ass?

A well mer et am Land mat 100 verschiddene Baute-reglementer ze dinn hunn, déi net nëmmen de Wunnengsbau erschwéieren, mee och den Ausbau vun Erneierbaren, hat déi viregt Regierung eng gemeinsam Circulaire un d'Gemenge geliiwert, fir eng

Harmonisatioun vun de Bautereegelungen. A bei der Ausschaffung vum nationale Bautereglement, deem nächste Schrëtt an dëser Saach, féieren anscheinend, laut Press, technesch a prozedural Froen beim Ausbau vun Erneierbaren zu Retarden. Kéint Dir eis eventuell soen, wou déi Aarbechten dru sinn a wat den aktuellen Timing vun dëser Saach ass?

An dann déi lescht, dat ass d'Fro zu der Wärmestrategie: Mir haten am Juni eng Demande gemaach, fir dës an der Kommissioun mat Iech zesummen ze thematiséieren, wat bis elo nach net zur Sprooch koom. Wat sinn Är Pläng, fir zesumme mat de Gemengen eng acceleréiert Dekarbonisatioun virzehuelen?

Et ass kloer, dass mir als Gréng dësem Projet de loi eis Zoustëmmung wäerte ginn, well d'Virfinanzierung ass e klore Plus fir d'Rapiditéit, e Plus fir d'Fairness. An et ass gutt fir d'Klima, a virun allem gutt fir d'Leit. Voilà. Mee dëse Projet de loi däerf kee Schlusspunkt sinn. Mir hoffen och op weider Äntwerte vun Iech.

Merci fir d'Nolauschteren.

Une voix | Très bien!

M. Claude Wiseler, Président | Merci, Madamm Welfring. Deen nächsten ageschriwwene Riedner ass den Här Sven Clement. Här Clement, Dir hutt d'Wuert.

M. Sven Clement (Piraten) | Merci, Här President. Léif Kolleeginnen a Kolleegen, „was lange währt, wird endlich gut“, seet d'Spréchwuert. Wann ee bedenkt, dass dat heiten eng Mesür ass, déi, wann ech mech richtig erënneren a richtig nogezielt hunn, dräi verschidde Finanzministeren a Budgetsrieden ugeschwat hunn an zwee verschidde Premiere schonn an hiren État-de-la-nationen ugeschwat hunn, da gesäit een, wat fir e Baart deen heite Projet u sech schonn hat, éier en iwwerhaupt abruecht gouf.

An do hätt ee sech jo awer schonn déi éischte Kéier, wéi hei e Regierungsmember et annonciéiert hat, kënnen erwaarden, dass et e bësse méi séier gaang wär. Mee nee! Et huet immens laang gedauert, bis dee Projet hei iwwerhaupt an d'Chamber koom, well d'Regierung léiwer op den Effet d'annonce, de réannonce an de réréannonce gesat huet, während d'Leit dobausse weiderhin op hir Hëllef gewaart hunn.

(Interruptions)

A wann ech Iech elo eppes soen ...

(Interruption par Mme Stéphanie Weydert)

Majo, Madamm Weydert, et deet mer wierklech leed, dass dat Iech stéiert, dass d'Leit mussen esou laang op Sue waarden, déi se virgestreckt hunn, en bonne foi, dass de Staat se séier géif remboursséieren. Dat kascht ganz vill Biergerinnen a Bierger Zësen. Dat kascht ganz vill Biergerinnen a Bierger gro Hoer, well se eeben net an deenen Delaie remboursséiert ginn, wou se waren.

(Hilarité et interruptions)

An ech erzielen Iech elo net aus menge perséinlechen Erfarunge mat der Verwaltung, wann et drëm geet, meng Wärmepompe deemools remboursséiert ze kréien. Dat war u Klengkaréiertheet u sech net ze iwwerbidden, wann et op eemol ëm eenzel Buschtawe geet!

Bei de Solarpannoen ass et esou: D'Präisser um früe Maart ginn erof. Mir wëssen, dass ëmmer méi Leit un der Energietransitioun wëllen deelhuele, mee dass si sech dat eebe grad deelweis net konnten a kënnen leeschten, well se keen Accès zu de richtige Präten hunn. Dofir ass dat heiten e wichtige Projet. An dofir wär dee Projet hei nach besser gewiescht, wann en éischter koom wär!

(Interruption)

Bref, elo ass en do. Mir begrëssen en.

Plusieurs voix | A!

M. Sven Clement (Piraten) | Mir si frou, dass mer, no dräi Finanzministeren an no zwee Premieren, dann elo endlech haut kënnen deem Projet zoustëmmen. Well dat heiten hëlleft de Leit. Dat heiten hëlleft eiser Ëmwelt. Dat heiten hëlleft eiser Energieonofhängegkeet. An dofir kënnen mer deem Projet hei och onageschränkt zoustëmmen. A mir freeën eis drop, wann et dann an Zukunft méi séier geet, wéi dat am Moment nach ass.

Ech hoffen, dass dee Backlog vun deenen aneren Demanden endlech opgeléist gëtt. A wann de Minister mer elo gläich seet, dat wär alles net esou, d'Leit géife ganz séier hir Sue kréien: Ech kann Iech eng ganz Hicheckt un Dossiere weisen, wou dat net de Fall ass.

(Interruption par M. Lex Delles)

Mir stëmmen deem Projet hei zou. Ech soen Iech Merci.

M. Claude Wiseler, Président | Merci, Här Clement. Dann huet elo den Här David Wagner d'Wuert. Här Wagner.

M. David Wagner (déi Lénk) | Här President, Investitiounen a Fotovoltaikanlagen an a Batterie sinn haut nach enger Minoritéit virethalen. Déi minimal Viraussetzung, fir dat kënnen ze maachen, ass, en Haus ze hu respektiv en Daach an dat néidegt Erspuertes respektiv den néidege Revenu, fir vun enger Bank Sue geléint ze kréien. Un deene Viraussetzungen ännert sech mat dësem Gesetz elo näischt.

Gemeinschaftlech a kooperativ PV-Anlagen, ob mat Hëllef vun enger Gemeng oder ouni, sinn zu Lëtzebuerg éischter seelen, wouduerch sech déi aktiv Uneegnung vun der Energietransitioun nach net esou richtig demokratiséiere konnt. Dass Klimaschutz gär als Privileeg vun e puer Bessergestaltene wouergeholl gëtt, huet dann och domadder ze dinn. Leit ouni déi néideg Ressourcen a Leit, déi loune respektiv a Kopropriétéit wunnen, hunn dowéinst manner d'Méiglechkeet, an eng Anlag ze investéieren.

D'politesch Fërderung vu kooperativer Finanzierungs- an Exploitationsmodeller am Beräich vun den erneierbaren Energien ass zu Lëtzebuerg zwar ëmmer mol erëm en Thema, mee wierklech ëmgesat gouf se bis haut net. Eng Méiglechkeet wier zum Beispill, dass d'Diech vun öffentliche Gebaier Energiekooperativen zur Verfügung gestallt ginn an esou Initiativen och lokal wéi national ënnerstëtzt ginn. Bis dat eng Kéier sou wäit ass, läit de Fokus op der staatlecher Ënnerstëtzung vun individuellen Anlagen op einzelnen Diech.

Prinzipiell fanne mir den Hauptpunkt vun dësem Gesetz och gutt a richtig, an dat ass de Prefinanzement vun de staatlechen Aiden; eng Fuerderung, déi mer och scho laang hunn. Bei Präisser ëm 2.000 Euro pro Kilowattpeak kann eng duerchschnëttlech Anlag séier 20.000 Euro kaschten. Do ass et da schonn en Ënnerschied, ob een déi 20.000 Euro selwer muss virstrecken oder ob ee ronn 10.000 Euro direkt vum Präis ofgehele kritt, well déi iwwer staatlech Hëllef da gedeckt sinn.

Dat ass ëmsou méi wichtig, well haut nach iwwer ee Joer vergeet, bis een déi Hëllef dann och vum Staat op de Konto iwwerwise kritt, an dowéinst vill Leit iwwer laang Zäit e Prêt oder e Montant bei der Bank blockéiert hunn, op deem dann awer och vill Zësen ufalen. Domat ginn Investitiounen méi deier, wéi se sollten. An den Hauptgewënner ass alt erëm eng Kéier d'Bank.

Geneesou richtig fanne mir och, dass d'Batterien och ënnerstëtzt ginn, an dat och elo a Fäll, wou Leit eng Batterie norüsten. D'Batterie gi séier méi bëlleeg a méi effizient, wouduerch et sech elo dättelech méi lount, eng unzeschafen, wéi nach virun e puer Joer.

Méi Schwierigkeeten hu mir awer mat der neier Berechnungsmethod fir d'finanziell Ënnerstëtzung. Déi féiert zu manner finanzieller Ënnerstëtzung, eiser Aschätzung no, onofhängeg vun der Gréisst vun der Anlag, mee besonnesch awer bei mëttlere bis groussen Anlagen. Domadder decidéiert dës Regierung eng zweet Kéier eng Baisse vun den Hëllef en setzt domat fir d'zweet Kéier en negativen Incentive beim Präis vu PV-Anlage fir d'Stéit.

Dat, Här President, ass awer net eis Haaptkritik bei dëser Thematik. Och wa mir de Prefinanzement ënnerstëtzen, wéilt ech awer u meng Agangsausso erënneren: Mir schwätzen hei iwwer en Dispositif, dee sech net un d'Majoritéit vun de Stéit adresséiert.

Als Éischt emol net un all Proprietär, well net jidderee wëll oder ka vill méi investéieren. Dofir hu mir schon oft gesot, dass eng net kommerziell Finanzquell misst erugezu ginn, fir dës Investitiounen no sozial gestaffelte Krittären ze finanzéieren. Dat géif bedeuten, dass net all Stot eenzel op eng Bank pilgeren a sech dann do verscholde muss, mee dass en ëffentlechen a solidaresche Finanzéierungssystem en place gesat gëtt, dee sech dorëms këmmert.

A ville Regiounen an eisen Nopeschlänner gëtt et esou Modeller, déi et och Leit ouni eegent Kapital a mat klengem Revenu erméiglechen, eng Renovatioun oder eng PV-Anlag ze finanzéieren. Et kann een als Beispill d'Société Wallonne du Crédit Social nennen, déi als Service public fungéiert an de Leit an der Wallonie bei der Renovatioun, mee och bei der Acquisitioun vun engem Logement hëlleft, ouni klassesch Bank, déi bei all Etapp ofkasséiert. Mir haten och viru Joren eng Kéier eng Motioun deposéiert, fir och esou e Prefinanzement ze proposéieren, nom Modell vun der eeëmoleger Région Picardie a Frankräich.

Och bei der Locatioun si mir fir e Paradigmewissel, ënner anerem datt den Energiepass en Impakt op de maximale Loyer géif kréien. De Vermieter vun engem schlecht isoléierte Gebai, dat ganz op erneierbar Energië verzicht, dierft an eisen Ae dann och just e méi klenge Loyer froen. Dat hätt zwee Avantagen – een direkten an ee laangfristegen –: Et géif séier méi bëllege Wunnraum an der Locatioun schafen, mee dofir awer perspektivesch d'Renovatiounsquot steigeren, well de Vermieter jo awer iergendeng Kéier en Interêt drun hätt. Mee virun allem wier et genee dat, wouriwwer entre-temps jidderee schwätzt, mee kee mécht: Dat wier eng sozial ekologesch Mesür.

Trotzdeem wäerte mer dat mat e bësse Bauchschmäerze wéinst e puer Problemer matstëmmen. Ech soen Iech Merci.

M. Claude Wiseler, Président | Merci, Här Wagner. Domat wär d'Lëscht vun eise Riedner ofgeschloss.

Dann hätt d'Regierung d'Wuert. Här Wirtschaftsminister.

Prise de position du Gouvernement

M. Lex Delles, Ministre de l'Économie, des PME, de l'Énergie et du Tourisme | Merci villmools, Här President. Jo, et ass e Projet de loi, dee schon den 22. November 2024 deposéiert ginn ass – dat heescht, en ass schon eng ganz Zäit laang hei an der Chamber, wou mer driwwer diskutéieren –, mee e ganz wichtige Projet. Well wa mer d'Zuele vun deene leschten zwee Joer kucken, dann hate mer 2024 e Rekordjoer bei den installéierte PV-Anlagen zu Lëtzebuerg, mat iwwer 8.000 installéierten Anlagen, déi zu Lëtzebuerg

ronn 150 Megawatt Leeschtung konnte produzéieren. 2025 wäert nach besser sinn. Do si mer bei iwwer 8.200 – d'Zuelen op den 1. Dezember – mat och schon iwwer 150 Megawatt un installéierter Leeschtung bei der PV.

Mir gesinn, dass do ganz vill ganz kleng Anlagen drënner sinn. An et ass genau esou, wéi verschidde Virriedner et gesot hunn, dass de Problem ganz oft besteet: Wann ech eng Anlag vun 20.000 Euro hunn, jo, da muss ech awer 10.000 Euro, déi am Fong als Subsid duerno rembourséiert ginn, bezuelen an et dauert eng gewëssen Zäit, bis ech se erëm zrëck kréien.

A grad do passt dëse Projet de loi dran, fir eeben do nach eng Kéier en Incentive ze ginn, fir de Prefinanzement direkt en place ze setzen, fir dass d'Betribber direkt dem Client just dee Montant kënnen verrechnen, deen ouni de Subsid vum Staat nach vum Client un d'Entreprise geschëllt ass.

An eebe grad do hu mer, fir op e puer Remarken anzegoen, e puer Punkten ugepasst:

Éischters: de Montant forfaitaire. Et ass gesot ginn – ech mengen, et war den Här Engel –, dass et riskéiere géif, immens héich Käschte mat sech ze bréngen, well d'Subsiden esou héich sinn: 50 % vum Staat – 62,5 % eng Zäit laang – plus deelweis nach eng Kéier 50 % dovunner bei Gemengen, soudass een op Subside war vun 93, 94, 95 % vun dem Invest, deen een an eng PV-Anlag gemaach huet.

Dat huet mat sech bruecht, dass och ganz vill Leit vläicht net méi gekuckt hunn, wat de Präis vun der Anlag war, soudass dowéinst och d'Präisser, wa mer et am internationale Verglach kucken, zu Lëtzebuerg deelweis méi héich sinn, wéi se dat awer an der Groussregioun sinn – um Material. Ech schwätze mol net nëmme vun der Main-d'oeuvre. Mee natierlech: Wann ech just 5 % muss bezuelen, da froen ech net emol en zweeten Devis oder en drëtten Devis, well ech brauch net ze vergläichen. A grad do hu mer elo hei ugepasst.

Ech ginn net jiddwerengem hei Recht, well nämlech de forfaitaire Montant pro Kilowatt mat sech bréngt, dass et eebe grad interessant gëtt, verschidden Devisen unzefroen an dann dee bëlleegste pro installéiertem Kilowatt ze huelen, well domat mäi Subsid och ka bis iwwert déi 50 %erausgoen. An eebe grad dofir ass et interessant, wann et also e méi bëlleegen Devis ass, do zouzeschloen an dann eriwuerzegoen.

Elo kann ee soen: „Majo, dee Bëllegsten, dat ass net ëmmer Qualitéit.“ Ma grad do hu mer och erëm eng Kéier ugepasst, well ee sech nämlech muss fir de Prefinanzement aschreiwen. Dat heescht, et ass een net d'office eligibel, fir de Prefinanzement kënnen ze huelen, mee et muss ee sech aschreiwen. Soudass mer och wëssen, dass ... An ech mengen, jiddweree vun eis gesäit heiansdo op de Soziale Meedie Campagnë vu Firmen, déi vläicht e bëssen douteux sinn oder vläicht verschidde Saache verspriche bei de PV-Anlagen, déi se installéieren, déi een net onbedéngt soll gleewen.

A grad do hu mer och nach eng Kéier e Rigel virdrun, well et nämlech kontrolléiert Entreprisë sinn, déi hei kënnen matmaachen, an och nëmmen déi kënnen vum Prefinanzement profitéieren. A wa se déi Krittären net erfëllen, wa se also och lusch Saache géinge maaachen, da gi se aus deem System erausgeholl. Dat ass d'Strof heibäi. An ech mengen, dass een do och direkt hannendru gesäit, dass duerno an der Bevëlkerung de Prefinanzement ganz breet wäert genotzt ginn an datt een, wann een net méi kann dovunner profitéieren, och e Wettbewerbsproblem huet.

Et geet eis awer drëm, dass de Betrib net muss ee Joer oder zwee Joer op seng Sue waarden. A grad dofir hu mer de „silence vaut accord“ hei dran: 15 Deeg, bis eng Äntwert muss do sinn. Wann net: Silence vaut accord! 15 Deeg no der Äntwert muss de Virement um Kont sinn.

Dat heescht, déi ganz Period, déi eng Entreprise vun der Demande bis zum Ausbezuelen huet, si maximal 30 Deeg. An deenen 30 Deeg sinn also déi zwou Etappe komplett digitaliséiert. D'Contrôle si mat dran. An de ganz groussen Avantage dovunner ass och, dass eebe grad, wann d'Betribber suivéiert sinn, d'Suen um Kont sinn, wat awer ganz oft ... An ech verstinn d'Bedenken, déi den Här Engel hat: net dass de Betrib duerno, well en 100 Anlagen installéiert huet, dann e Cashflowproblem kritt. Fir dass en déi dann och sécher um Kont huet, dass d'Suen dann och do sinn.

Et ass gefrot ginn: Stand-alone-Batterien. Déi ginn net virfinanziert, mee iwwert de Klimabonus.

Et gouf d'Fro vum Prefinanzement, wou et drun ass. Ech weess, dass den Här Wilmes amgaangen ass, drun ze schaffen. Ech mengen, et ass am Moment bei den Autoen a bei nach eppes, wou en amgaangen ass, drun ze schaffen. Dat heescht, déi nächst Etappe vum Prefinanzement sinn amgaang, gemaach ze ginn.

Hei ass et och esou, dass mir elo mol de Prefinanzement fir d'Fotovoltaik am Wirtschaftsministère hunn, awer just provisoersch. Dat wäert erëm bei den Environnement eriwuergeen. Firwat ass et elo am Wirtschaftsministère? Majo, well mir den digitalen Outil scho während de Covid-Aiden haten, soudass mer et direkt en place konnte setzen. Dofir och den Depot, deen 2024 konnt gemaach ginn. Parallell lafen d'Aarbechte beim Environnement, fir dass si deen nammlechte System hunn. An da wäert de Switch ganz eriwuergeen, soudass dat wäert beim Environnement, wéi all déi aner Klimabonus-Aiden, sinn.

Et ass d'Fro gestallt gi vun de Bautereglementer. Ech weess, dass den Interieur do amgaangen ass, drun ze schaffen, och am Kader vum „Einfach – Séier – Erneierbar“. Wou sech d'Fro gestallt ginn ass: „Brauch ech nach eng Autorisatioun, fir eng Fotovoltaik op den Daach ze leeën?“ Uniform Bautereglementer, déi Saachen, déi sinn ... Ech weess, dass doru geschafft gëtt. Ech kann Iech awer hei net soen, wou genau déi Aarbechten dru sinn.

D'Wärmestrategie, do kann ech Iech äntweren: Do si mer amgaangen, drun ze schaffen. An do wäerte mer d'Consultatioun mat de Gemenge Mëtt Januar ufänken.

Une voix | Très bien!

M. Lex Delles, Ministre de l'Économie, des PME, de l'Énergie et du Tourisme | Ech soen awer Merci fir déi breet Zoustëmmung.

Une voix | Très bien!

M. Claude Wiseler, Président | Merci. Et ass nach eng Fro do, Här Minister, vum Här Clement. Här Clement.

M. Sven Clement (Piraten) | Merci, Här President. Ech hu just eng Fro un de Minister, well en dat elo nach eng Kéier explizitt och genannt huet. Dat ass de Fall, wou en Installateur aus dem Register, dee jo elo geschafe gëtt, radiéiert gëtt. Do gesäit d'Gesetz am Moment vir, datt dann all Demande, déi virun där Radiatioun agereecht an deposéiert gouf, d'office refuséiert wär.

Elo ass et jo awer esou, datt de Client eventuell schon Demarchen do gemaach huet, eventuell och schon eppes bezuelt huet. Wéi gesitt Der et do

mam Konsumenteschutz? Wat maache mer, wann do tatsächlech scho Kontrakter en cours sinn? Wéi schütze mer de Client? Well dat war, mengen ech, och eng Fro, déi nach net bis zum Schluss beäntwert war.

Merci.

M. Lex Delles, Ministre de l'Économie, des PME, de l'Énergie et du Tourisme | Dofir hu mer eebe grad déi zwee Regimier, déi parallell lafen. Deen ee mat traditionellen Aidëprozeduren, fir kënne déi 50 % unzefroen, soudass mer dann erëm an dee Regimm ginn. Mee da si se ausgeschloss, och an Zukunft, fir kënne e Prefinanzement ze maachen, fir eebe grad do dee Kompetitivitéitsvirsprung, wann een do ka matmaachen, wou mer kënne garantéieren, dass et eng Qualitéit huet, wou mer kënne garantéieren, dass et e Betrib ass, deen d'Krittären erfëllt. Da kann en dann net méi dovunner profitéieren, wann e radiéiert ass, mee da fält en an den normale Klimabonus-Regimm.

M. Claude Wiseler, Président | Merci, Här Minister. Domat wär dann d'Diskussioun zu dësem Projet de loi ofgeschloss.

A mir géingen zum Vott iwwert dëse Projet de loi kommen. Et ass de Projet de loi 8463. Den Text steet am Document parlementaire 8463⁹.

Vote sur l'ensemble du projet de loi 8463 et dispense du second vote constitutionnel

D'Ofstëmme fänkt elo un. De Quorum ass erreecht. Vote par procuration. An de Vott ass ofgeschloss.

D'Resultat vum Vott ass: 59 Jo-Stëmmen, keng Nee-Stëmm, keng Abstentiuon. Dëse Projet de loi ass also mat 59 Jo-Stëmmen à l'unanimité ugeholl.

Ont voté oui : Mmes Diane Adehm, Nancy Arendt, MM. Maurice Bauer, Jeff Boonen, Alex Donnersbach, Emile Eicher, Félix Eischen, Paul Galle, Mme Françoise Kemp, MM. Marc Lies, Ricardo Marques, Mmes Octavie Modert, Nathalie Morgenthaler, MM. Laurent Mosar, Jean-Paul Schaaf, Charles Weiler, Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering, Fernand Etgen, Patrick Goldschmidt, Gusty Graas, Mmes Carole Hartmann, Mandy Minella, Lydie Polfer et M. Gérard Schockmel ;

M. Dan Biancalana, Mmes Taina Bofferding, Liz Braz, Francine Cloener, M. Yves Cruchten, Mme Claire Delcourt, MM. Mars Di Bartolomeo, Georges Engel, Franz Fayot, Claude Haagen, Mme Paulette Lenert et M. Ben Polidori ;

MM. Dan Hardy, Fred Keup, Michel Lemaire, Mme Alexandra Schoos et M. Tom Weidig ;

Mme Djuna Bernard, M. Meris Sehovic, Mmes Sam Tanson et Joëlle Welfring ;

MM. Sven Clement et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Dann ass dat esou decidéiert.

7. Ordre du jour

Well d'Zäit elo déi ass, déi se ass, géing ech proposéieren, conformément zu der Decisioun vun der Conférence des Présidents, datt mer de Moien haut esou ophalen an datt mer déi zwee Texter, déi nach op eisem Ordre du jour stinn, am Ufank vun der Sessioun vun de Mëtten dann op den Ordre du jour huelen.

Ass d'Chamber domadder averstanen?

(Assentiment)

Dann ass dat esou decidéiert.

Déi nächst Sëtzung ass de Mëtten um 14.00 Auer.

Dann hiewen ech d'Sëtzung op.

(La séance publique est levée à 13.06 heures.)

120^e séance

Sommaire

1. Ouverture de la séance publique

M. Claude Wiseler, Président

p. 44

2. Dépôt d'une proposition de loi par Mme Claire Delcourt

Exposé : Mme Claire Delcourt

p. 44

3. 8596 – Projet de loi relative à une contribution de l'État aux coûts à transposer en tarifs pour l'utilisation des réseaux électriques pour l'année 2026

Rapport de la Commission de l'Économie, des PME, de l'Énergie, de l'Espace et du Tourisme : Mme Carole Hartmann

Discussion générale : M. Jeff Boonen | M. Georges Engel | M. Tom Weidig (intervention de M. Marc Goergen) | Mme Joëlle Welfring (dépôt des motions 1 et 2) | M. Marc Goergen | M. David Wagner

Prise de position du Gouvernement : M. Lex Delles, Ministre de l'Économie, des PME, de l'Énergie et du Tourisme | M. Marc Goergen (parole après ministre) | M. le Ministre Lex Delles

Vote sur l'ensemble du projet de loi 8596 et dispense du second vote constitutionnel

Motion 1 : Mme Carole Hartmann | M. Jeff Boonen | M. Georges Engel | Mme Joëlle Welfring

Vote sur la motion 1 modifiée (adoptée)

Motion 2 : Mme Joëlle Welfring | Mme Carole Hartmann | M. Tom Weidig

Vote sur la motion 2 (adoptée)

p. 44

4. 8395A – Projet de loi portant création du Commissariat du Gouvernement à la souveraineté des données et désignation des organismes et autorités compétents prévus aux articles 7, 13 et 23 du règlement (UE) 2022/868 du Parlement européen et du Conseil du 30 mai 2022 portant sur la gouvernance européenne des données et modifiant le règlement (UE) 2018/1724 (règlement sur la gouvernance des données) et du point d'information unique prévu à l'article 8 du règlement (UE) 2022/868 précité et portant modification de la loi du 1^{er} août 2018 portant organisation de la Commission nationale pour la protection des données et du régime général sur la protection des données

p. 51

Rapport de la Commission de l'Enseignement supérieur, de la Recherche et de la Digitalisation : M. Gérard Schockmel

Discussion générale : Mme Françoise Kemp | M. Ben Polidori | M. Tom Weidig | Mme Joëlle Welfring | M. Sven Clement | M. David Wagner

Prise de position du Gouvernement : Mme Stéphanie Obertin, Ministre de la Digitalisation | M. Ben Polidori (parole après ministre) | Mme la Ministre Stéphanie Obertin

Vote sur l'ensemble du projet de loi 8395A et dispense du second vote constitutionnel

5. 8634 – Projet de loi portant modification :

1° du Code de la sécurité sociale ;

2° du Code du travail ;

3° de la loi modifiée du 3 août 1998 instituant des régimes de pension spéciaux pour les fonctionnaires de l'État et des communes ainsi que pour les agents de la Société nationale des chemins de fer luxembourgeois

p. 54

Rapport de la Commission de la Santé et de la Sécurité sociale : Mme Françoise Kemp

Discussion générale : Mme Françoise Kemp | M. Gérard Schockmel | M. Mars Di Bartolomeo (interventions de M. Gilles Baum, M. Gérard Schockmel, Mme Françoise Kemp et M. Laurent Zeimet) (dépôt des amendements 1 à 4) | Mme Alexandra Schoos | Mme Djuna Bernard | M. Sven Clement | M. Marc Baum (dépôt de la motion 1) | M. Jeff Boonen (intervention de M. Fernand Etgen) | M. Ben Polidori | M. Claude Haagen | M. Jeff Boonen

Prise de position du Gouvernement : Mme Martine Deprez, Ministre de la Santé et de la Sécurité sociale

Amendement 1 : M. Mars Di Bartolomeo

Vote sur l'amendement 1 (rejeté)

Retrait des amendements 2 à 4

Vote sur l'ensemble du projet de loi 8634 et dispense du second vote constitutionnel

Vote sur le renvoi de la motion 1 à la Conférence des Présidents (adopté)